



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 8

Yangia anidakangma :



Tir Yimym



tir\_yimym



tir yimym

TAPAK 7

**Season tembangba sülen  
Salah-i Liverpool toktsütsü**

**Belarus tir Lukashenko-i tang  
mezüngbuba North Korea semdang**



VOL. XXIII ISSUE NO. 162 (ADOK 162) DIMAPUR YANGTEPNÜ (THURSDAY) METSÜREMI (MARCH) 26, 2026 ₹ 5.00

## Koridang constituency atema Paid Holiday agütsür

**Dimapur, March 25, 2026 (TYO):** Home Department, GoN-i April 9, 2026 (Brihostibar) nü 28-Koridang (ST) Assembly Constituency nung vote enoktsür ajak nem Paid Holiday agütsüba osang ka metetdaksüogo.

Representation of the People Act, 1951 nung Section 135B nung aliba ama iba nung Constituency nung sorkar, banks, financial institutions, private business establishments, industrial undertaking mesüra

daily wage/casual workers dena tanga establishment nung inyaker ajak asoshi Paid Holiday asütsü ta Home Department-i ashi.

Iba Constituency nung voter ka ama register süa lir saka tangalen mapa inyaker ta süra item nisungtem nem-a paid holiday agütsütsü ta parnokisa ashi.

Ajüsüaka, mapai maoba ajanga lendong ataloktsü mesüra takoksa tulu ajurutsüsa mapa inyaker temalen shia aliba nung madentsü ta Home Department-isa metetdaksüogo.

## Mkg DC & DEO-i tetuyuba agütsür

**Dimapur, March 25, 2026 (TYO):** 28 A/C Koridang (ST) constituency nung by-election agütsü aliba atema Mokokchung Deputy Commissioner & District Election Officer (DC & DEO) Ajit Kumar Verma, IAS-i sorkar mapa inyaker ajak nem tetuyuba ka agütsüogo.

Mokokchung District nung election duties lemzüka aliba Heads of Departments (HoDs) aser officials/staff ajak pei pei talidak yutsür maotsüla. Iba ya

election dak sendakba maparen tiptema inyaksü atema lir ta Mokokchung DC & DEO-i ashi.

Sorkar ketdangsür mesüra staff kar danga koda masüba khuret ajanga station toktsür aotsüsa kümra DC & DEO nungi tezüluba nung temelaba meshitsüla ta paisa ashi.

Iba tetuyuba sülen manidakertem dak ozüing lateta aliba ama mapa inyaksü ta paisa shisem.

## March 28 nü working Saturday asütsü

**Dimapur, March 25, 2026 (TYO):** Nagaland Governor-i Kohima nung aliba sorkar office tem asoshi March 28, 2026 (4th Saturday) mapa inyakba anogo asütsü metetdaksüogo.

Iba ya Financial Year Closing mechi nung lir. Iba anogo ya Banks aser Financial Institutes atemaa Negotiable Instruments

Act, 1881 kübok mapa inyakba anogo asütsü ta Home Department, GoN-i ashi.

Iba anogo nung Administrative Heads aser Heads of Departments-i pei pei Department nung ketdangsürtem aser staff ajak office-i arudaksütsüla ta Home Department-isa metetdaksüogo.

## ECI-i exit polls atema tenokdangba agütsür

**Dimapur, March 25, 2026 (TYO):** Election Commission of India (ECI)-i Assam, Kerala, Tamil Nadu, West Bengal aser Puducherry assembly elections den state 6 nung Assembly constituency ti by-elections atema exit polls inyakba aser sangdongba nung tenokdangba agütsüogo.

Iba nung ajemdaker Chief Electoral Officer, Nagaland-ia April 9, 2026 anepdang 7:00 ako nungi nikongdang 6:30 ako tashi

tenokdangba agütsüogo.

Iba mapang print, electronic media mesüra tanga sabangtem ajanga exit poll inyaksü, adoktsü mesüra prokshitsü memelar ta CEO Nagaland-isa metetdaksü.

Polling asütsü ghonda 48 jakdang nungi tenzüker polling maparen metembang tashi electronic media nung opinion polls mesüra iba mesükba survey findings sangdongtsü memelar ta CEO-isa ashi.

## Nagaland nung Mar 28 nü Earth Hour amungtsü

**Dimapur, March 25, 2026 (TYO):** Nagaland nung Department of Environment, Forests and Climate Change-i Earth Hour küm 20 ajungba pusema nungitba metetdaksüogo.

WWF-India (World Wide Fund for Nature-India)-i mepishiba ama Nagaland nunga March 28, 2026 aonung 8:30 ako nungi 9.30 ako

tashi "The Biggest Hour for Earth" otsü yangluba nung shilem agütsü ta Department-i ashi.

Anungji tebilemstü khuret abenba sensotem ama nisung ajaki temalen shia aliba mapang office aser kidang non-essential lights ajak aseptsü mepishir ta Department of Environment, Forests and Climate Change-isa ashi.

## MP Supongmeren-i Foothills Road osang jangjashitsür

**Dimapur, March 25, 2026 (TYO):** Foothills Road atema kin 14 hohotemi No Objection Certificate (NOC) agütsüba agienogo ta social media sabang balala nung prokshibaji tiyazü aser nisung mashileni anisatsü atema inyakba mapa ka lir ta Lok Sabha MP S. Supongmeren Jamir-i metetdaksüogo.

Ministry of Transport and Highways nungi temelaba anguba sülen damage property compensation ajak agütsütsü ta osang prokshiba ya tiyazü ta pai ashi.

Foothills Road ya Trans-Nagaland Highway züingshir aser tongtipang mapatong ajanga Nagaland nung tesem balala sendakteptsü aser rongsenketzüing renloktsü atema nükjidong lir. Nagaland sorkari Ministry of Road Transport and Highways nem Detailed Project Reports (DPRs) agütsüogo aser iba nung Foothills Road ya Rs. 3,284 crore shi endoka National Highway ka akümtsü asüngdangogo ta MP Supongmeren-i ashi.

Anungji State sorkar aser

bangdak department temi Foothills Committee züingsemtem, kin hohotem aser ali kiburtem dena iba mapatong den sendaktepa alir ajaki tamang akatsüsa mapate inyaksü ayongzüker. Asenok külemi tebilemstütem kokteta inyaksü atema olemtep alitsüla aser haihaura kateptsüla ta paisa ashi.

Iba mapatong takok ngua inyaksü atema State sorkar, Ministry of Road Transport and Highways, aser ali kiburtem tsüingda mangatetep agientsüla ta MP Supongmeren-isa ashi.

## Temelenshiji asen dak nungi tenzüksüla: Imtiwapang



Wb. Imtiwapang-i Kinunger Putu yimsüsürtem den tatar salang nung tangokba noksa nung angur.

**Mokokchung, 25th March, 2026 (TYO):** Temelenshiji asen dak nungi tenzüksüla ta asüba tangatetba yur election nung noktaker", ta 25th March nü Imtiwapang shiba tang aruya aliba 28-Koridang Assembly Constituency by-election nung Independent candidate ka ama tokteptsü lir, pai pa election-i aiba sangdongba den nübu ayimba sentong ka Kinunger yimdak Tatar Salang nung akadang metetdaksü.

Politics nung tejak tasen süaka nübur tenzüka mapa nungbo tejak tasen masü, ta pai ashi. Ongpangkong Kaketshir Mungdang (OKM), Mokokchung Town Lanur Telongjem (MTLT), Ao Kaketshir Mungdang (AKM), sorkar mapa nung süshia aser lokti balala nung akokba agi shilem agia aruogo, anungji, item tajangshibatem bener ano jenjang tuluba ka nung nübur tenzüksü tejangraba nung tanü election-i aitsü mulungteter apusor, ta paisa ashi.

Koridang nung ya teinyaksü aika ajiteter, anungji, asenok külemi teka amteper ora itemji takoktsü lir, ta pai ashi. Pa mangdang kar lemsatepdang, constituency kübok aliba yim shia nung terenlok bener arutsütsü, aluyimer jenjang ajungkettsütsü, lanurtem mapa inyaksü maangka lapoktsütsü, ajak dak alia Koridang sanger rangben telungjem nung tejakleni anitsü merangtsü, ta metetdaksü.

Maangka dang ngura, constituency lenmangtem tajungba yanglutsütsü, nübur aser talisa aluyimer taküm tajungba kümtsütsü asoshi temulung agütsütsü, lanurtem jenjang ajungketba mapatem, education aser health sector jenjang tajungba asoshi inyaksü, ta ashi. Ajak dak alia terenlok asoshi aruba rongsentem ochi shia nübur tajangzüker asoshi amshitsü, ta paisa metetdaksü.

Lungjemmer aser teka amteper ora, terenlok süshia mesüra lokti nung teraksa/ochimashi süshia item ajakji melenshiyonga otettsü. Anungji, yim, kin-kidong mesüra telok balala yamaji kecha telemsa melii lungjemmer aotsü merangtsüla. Kodang asen kija taküm melenshidir yim melenshidir asen constituency melenshitettsü, ta paisa shisem.

"Tanü ni yangi aruba ya tenangzüker balala ashitsü atema kisüing aruba masü, saka nenok tamang, leniba aser teyari nüngdaka aruba lir", ta pai Kinunger yimertem dang pa nem yimli agüjang ta mepishia metetdaksü. Temelenshiji polling booth nungi tenzüker, anungji, yimertemi kanga junga shisadanger shibai Koridang sanger, Ao lima aser Naga nung asoshi inyaktettsü ta bilemer, telemtetba tajung agidaksünür, ta paisa shisem.

Iba kümsük ya küm ana shi anünga lir, anungji, mapang yari

Koridang nung tebilemstü kechisa lir, itemji bushiteta nübur tajangzüker asoshi inyaksü merangtsü, ta osangbener kari asüngdangba ka langzüa ashi.

Kinunger yimdak kibong 50 shi lir, yimertemi pa pela-a agizükba den telangzüba tajung den temoatsü agütsüba asoshi kanga pelar. Tanü iba sentong temulung süa agiogo, ta Imtiwapangisa metetdaksü.

Iba sentong nung Kinunger Village Council Chairman, Akangtemsu Tatar-i jembidang, candidate ajak pela shishia agizükba den süngküm lapoka yutsütsü, anungji, candidate ajaki nübu tayim shia tobur junga yimdaksünür, ta mepishia metetdaksü. Süngküm kübok election tesünep nung agütsü asoshi temzüng ozüing lateta lir, anungji, abelenertem temzüngi melaba ama tapet merenshitsü, anungji, ajaki ibaji akümtsübua shilem agidaksünür, ta paisa metetdaksü.

Tang Koridang by-election atema nomination file asür parnok 7 lir. Parnok rongnung Independent candidate Imtiwapang-i mezüngbuba Kinunger yim semdanga pa election-i aitsü sangdongogo. Kinunger yimdak vote ajak senteper 307 lir. Koridang by-election ya 9th April, 2026 nü agütsü aser candidate kar metoktepnüra pei tenüing agütsü asoshi tesüsabuba anogoji 26th March, 2026 lir.

# Mokokchung nung Child Safety aser POCSO Act indang awareness agütsü



**Dimapur, Metsüremi/March 25 (TYO):** Tanurtem kumzüka ayutsü aser POCSO Act mapa kuma inyakba indang awareness agütsüba sentong ka Department of Social Welfare kübok District Child Protection Unit (DCPU), Mokokchung ajanga March 25, 2026 nü PM Shri Government High School, Mokokchung Village nung ayongzüka liasü.

Iba sentong nung shisalen sayur ya Imnatola, District Supervisor, Child Helpline, Mokokchung Town liasü.

Child protection, personal safety aser Protection of

Children from Sexual Offences (POCSO) Act kübok ozüing agi kumzüka ayuba indang kaketshir aser tesayur nem angatetdaksütsü nükjidong nung iba sentong ya ayongzüka.

Iba sentong nung school environment tajungba kumdaksütsü indang jembi aser tanurtem dang yimya balala nung tim masüba mapa inyakbatem ajangshia lira osang agütsütsü ajungshia liasü.

Watsü Mungdang tir Tianaro Jamir-i iba sentong nung tajungshi o jembidang, 'personal boundaries' angatetsü nüngdakba,

saksalema alitsüba aser tensa tamajung ajangshiba indang pei mulung lema aliba nisung taintem nem osang agütsütsü indang lai ashi.

Shisalen sayur Imnatola-i child rights, POCSO Act aser Child Helpline services teinyaktsü indang tejangja rateta ashi. Lai kaketshirtem dang tetsübo makai teyari meshitsü ajungmeso aser parnok tenüing mesüra maitsü temai madokdaksütsü ta ashi.

Sentong tembanga Samuel Kapu, District Child Protection Officer, Mokokchung ajanga melepzüng o jembia liasü.

# IndiaSkills Nagaland 2025 takoker nem tetushi agütsü



IndiaSkills Northeast Regional Competition nung Nagaland nungi takok angurtem nem tetushi agütsüba sentong nung tangokba noksa.

**Dimapur, Metsüremi/March 25 (TYO):** IndiaSkills Nagaland 2025 kübok tenüingsang agütsüba sentong ka March 25, 2026 nü Directorate of Employment, Skill Development & Entrepreneurship, Kohima nung agia liasü, kong sentong akhumdong ka ama Advisor, Labour, Employment & Skill Development and Excise, Moatoshi Longkumer dena liasü.

IndiaSkills 2025-2026 Nagaland State Competition ya regional aser national levels nung shilem agütsü atema 'skilled youth' jangjateta anitetsü aser kasa mapang vocational skills tajungtiba kumdaksütsü nükjidong nung agia liasü.

Advisor, Moatoshi Longkumer-i iba sentong ya temelenshi mapang ka lir, kong takok anguba aser pei teinyaktsü ajuruteper ta ashi. Pai IndiaSkills Competition 2025-26 indang state-level aser regional-level takok angurtem nem tenüingsang agütsü aser parnok dak skills, yimya tajung aser temulungtetba lir ta ashi.

Skill ya secondary masü saka

tashi, akumtsübo aser linük yangerba tenzükdak ka lir ta pai ashi.

Ano national competition agütsü aliba dak sendakba nung, shilem agirtemi nüburtem teimla, parnok dang sayur mangdang aser lanur aika tejangraba bener aotsü, ta ashi. Tetokteperba ya medals angutsüba atema kisüing masü saka 'standards, precision aser professionalism' shidak amshiba indang lir ta pai ashi.

Tesayurtemi shilem tulu agiba indang lemsatepdang, parnoki shilem agiba ya rongsen agi alizüksü makok, kechiaser mapa tashi tetokteper tem ajunga bendanga agütsüba tesayur aser reju tem ajanga aniteter, ta Advisor Moatoshi-i ashi. Pai shilem agirtem dang tasü ita ochi nung tokteptsü ayongzüka aser parnok national sapang nung lir aser medals bener arutsüba kisüing masü saka tajangshiba aser tarutsü asoshi mangdang tuluba bener arutsüla, ta ashi.

Skill India Digital Hub portal ajanga candidates 147 tenüing

züluok aser categories asem - Restaurant Service, Fashion Technology aser Graphic Design Technology - nung state-level competition atema nisung 57 qualify süa liasü.

Nagaland tenüing nung regional level nung tokteptsü asoshi candidates pezü shim. IndiaSkills Northeast Regional Competition nung Imtisangla Kangshou-i Restaurant Service nung silver medal angu, Vimeneno Phira-i Fashion Technology nung bronze medal aser ano Fashion Technology nung Tonikali Yeptho-i Medal of Excellence ngua liasü.

National-level competition ya March-April 2026 nung agütsü sentong lir aser international-level competition ya Shanghai nung September 2026 nung agütsü lir.

Iba sentong tembanga Director, Employment, Skill Development & Entrepreneurship, Savio Visa-i melepzüng o jembi aser sentong nung Additional Director, Zubemo Lotha Tsanglao menden liasü.

# Kohima nung National Emergency Life Support sentong tembangogo

**Dimapur, Metsüremi/March 25 (TYO):** Nagaland Institute of Medical Sciences and Research (NIMSR) ajanga anogo asem atema National Emergency Life Support on training of trainers sentong NIMSR, Kohima nung ayongzüka March 25, 2026 nü tembangogo.

Director-cum-Dean, NIMSR, Dr. Soumya Chakraborty lenisüba kübok asemnü National Emergency Life Support (NELS) Paramedic Training of Trainers (ToT) ya agia liasü.

Iba sentong ya epartment of Emergency Medicine, JPNATC, AIIMS New Delhi ajanga NELS Centre of Excellence aser WHO Collaborating Centre for Emergency and Trauma Care den lungjemer agia liasü.

Iba training nung Nagaland tesem balala nungi doctors aser nurses ajak agi 20 shilem agia liasü. Clinical skills tashi itshtitsü, shisatsü ulushitsü aser

state nung emergency care delivery nung lenir shilem tasü ita agitetsü asoshi iba training ya ayongzüka liasü.

Iba training mapang lectures, hands-on skill stations, simulations, megacodes, ambulance exposure aser structured instructor training modules tem agia liasü.

Ajungben timtem atalokba tajungtiba nung anepalutsüba kisüing masü saka pei districts nung trainers ama inyaktsü nükjidong nung iba sentong ya ayongzüka.

Iba sentong ya AIIMS New Delhi nungi Dr. Hannah Chawang aser Dr. Sahana Twinkle, AIIMS Bilaspur nungi Dr. Prawal Shrimal aser Tomo Riba Institute of Health and Medical Sciences nungi Dr. Kemba Padu nungeri agia liasü.

Iba training ya national standards nung ama agi aser state nung timtem ajurubatem, talisa nüngdakba osettsüset abensa maliba yari agia liasü.

# Dimapur nung Market Linkage indang State Level Seminar agi



**Dimapur, Metsüremi/March 25 (TYO):** Spice cultivation temaba jenjangi ajungkettsü aser North East region nung market tesendaktep tashi itshtitsü nükjidong nung Ministry of Commerce & Industry, Government of India kübok Spices Board India ajanga March 25, 2026 nü Town Hall, Dimapur nung State Level Seminar and Market Linkage Programme on Spices ayongzüka liasü.

Sentong akhumdong Razouvollie Dozo, NCS, Additional Secretary, Horticulture ajanga iba sentong nung jembidang, küm aika jembishiniüa aruyonga Nagaland nung market tesendaktep tashi mait aser spices, cereals, süngjang-lijang aser aonsotsü densema crops balala atema jungjunga yanglua mali, ta ashi.

State ali tajung, tzüingsang-mopung tapet aser meranga inyakba aluyimer lir, aser tebilemstü tulutiba ya production nung masü saka marketing aser sustainable market systems yanglutsüba nung keta lir, ta pai ashi.

Ali tila-la aliba ajanga production ajema adoker aser market nung aginüba ama magütsüteter, ta ashi. Pai quality control, export standards aser post-harvest handling practices shidak nüngdaker, ta ashi.

Aluyimer kisüingi iba tebilemstü mokoktettsü, aser sorkar departments, entrepreneurs, talir aser Farmer

Producer Organisations (FPOs) külemi inyaktsü nüngdaker, ta Dozo-i ashi.

Aggregation, sorting, grading, value addition, marketing of agricultural produce amshia market tesendaktep tashi itshtitsü atema lanur entrepreneurs temi tongtipang shilem agitetsü, ta pai ashi.

Skill development aser capacity building shidak lira lanurtemi aluyimba ya takum alitsü asoshi teimla tajung ka kumdaksütsü ta ashi.

Pai value addition atema infrastructure peria maliba indanga lemsatep, aser jenjang ajema akumba aser processing facilities maliba ajanga aluyimer akoksar, ta ashi.

Osettsüset karbo 'middlemen' temi state alema oa tesem balala nung sen tali temloker yoka tajangzüka anguba lir, aser ibaji ajanga local stakeholders temi maongka magitetba sayur, ta Dozo-i ashi.

Dr. Cressida Jamir, Deputy Director, Agriculture ajanga Nagaland nung aluyimer asoshi market linkages tashi tait amenokba nung maneni timtem ajuruba lemsatep aser küm aika jembishiniüa aruaka structured market system dangar memeneper lir ta ashi.

Sentong nung Rituraj Hazarika, Chief General Manager, M Junction ajanga North East nung spice marketing tasa indang jembia liasü.



March 25, 2026 nü New Delhi nung Defence Minister, Rajnath Singh leniba nung Parliamentary Consultative Committee senden mena Border Roads Organisation atema jembidang tangokba noksa nung angur.

### Alima nung TB agi shiranger shilem 25 bo India nung lir

**New Delhi, Metsüremi/ March 25 (Agencies):** India-i tuberculosis (TB) tashidak anema raraba tsütsü terenlok lir, ajisüaka tang tashi iba tashidak ya tayongzüka ka lir.

Tang alima nung TB tashidak agi shiranger shilem 25 bo India nung lir aser India nung iba tashidak meputetba nütsüing-a million aika lir, ta Centre sorkari sangdongba Tuberculosis Fact Sheet 2026 nung shia lir.

Greater Noida nung World TB Day 2026 anogomong sentong ka nung jembidang Union health minister J P Nadda-i, alima nung TB samatsütsü alizüing ayuba matongdangsa India nung iba tashidak samatsütsü, aser ibaji Ato kilonser Narendra Modi lenisüba nung "jan bhagidari" inyakyim kübok inyaksü, ta metetdaksü.

Health Minister-i, India nung TB shilem 21 ajema kümogo aser 2015 küm nungi 2024 küm tsüingda TB agi asüba shilem 25 ajema kümogo, ta metetdaksü.

Tang India nung iba tashidak agi shiranger shilem 92 bo treatment agi

ayimjemer, ta pai ashi

TB Mukht Bharat Abhiyan kübok nisung crore 20 dak iba tashidak tendangogo aser nisung lakh 32 dak TB putetogo, ta pai metetdaksü.

Paisa, "Anogo 100 campaign ayongzüka akatsü aser iba campaign kübok yimtsüing aser jilatem nung ward lakh 1.58 ayimjemtsü. Iba dak alia shirangertem anepalua yaritsü atema AI-enabled TB Mukht Bharat app amshidar," ta metetdaksü.

Tuberculosis Fact Sheet 2026 ajanga ashiba agi, TB ya sensak tia, chiyungtsü agi matuba aser libaliro den sendaktepa lir, aser talisa sensakertem iba tashidak agi kongshir.

"Diabetes aser HIV keta alirtem, moko achirtem, yi jemertem aser nisung longsoa aliba tesem nung alirtem iba tashidak melamela menar. Iba denji külemi drug-resistant TB ya tebilemstü onük ka lir, 2024 küm item ama case 55,000 liasü," ta report nung shia lir.

"Iba tashidak anema raraba nung terenlok lir, ajisüaka tang tashi tetsükdaksüa lir. Iba

tashidak temaitsü keta alir shilem 64-i teyari mebushir, aser ibaji nisungtemi sendokba, iba tashidak indang rajema maliba mesüra senostü maliba kulitem ajanga lir. Ibaji ajanga menor ang tashidak puteter aser tangar nem-a tashidak menaloktsür," ta report nung shia lir.

Item tebilemstü koktettsü atema sorkari outreach den külemi technology amshir. Nishay Mitra programme kübok chiyungtsü densema teyari balala agütsür aser shirangertem anepaluba tsütsü yaritsü atema TB Mukht Bharat app amshir.

Union Minister Nadda-i, "TB ya nokdangtettsü akok aser taneptsü anguba tashidak ka lir, anungji iba tashidak agi shirangertem mesendoktsüla. Tekeraba nung iba tashidak puteta treatment agitsüji kanga tongtibang," ta metetdaksü.

Health ketdangsertemi ashiba agi, TB keta aliba temaitsüji aketba dang masü saka temaitsütem rongnung temang metaba, temang touzüik ajema akümba, anibelemba, teku ashiba aser aonung asentzü asenba densema lir.

### West Asia nungi India nunger lakh pezü meyipa aruogo: MEA

**New Delhi, March 25 (Agencies):** Tang West Asia nung rara aliba mapang kaketshir 717 densema India nung 1,043 Iran nungi anitetogo, ta Bodhbarnü Ministry of External Affairs (MEA)-i metetdaksü.

New Delhi nung Additional Secretary (Gulf), MEA, Aseem R Mahajan-i, tayimtsü senzüba tensa tajungba kümдар, aser February 28 nü rara tenzüka sülen tang tashi nung India nunger lakh 4.26 meyipa aruogo, ta metetdaksü.

"Iba mapang nung India nung tayimtsü aser bendanger tayimtsü 2,149 West Asia nungi India-i aruogo," ta pai metetdaksü.

MEA-isa, "Onoki Gulf aser West Asia region nung tensa maneni mita reprangdar. Iba region nung aliba India nung kümzüka alitsü atema onoki inyaker," ta metetdaksü.

MEA indang Control Room ajanga India nungertem den tongtepratepa yariteper.


"Onoki yaritepa India nung Iran nungi aniteta Armenia aser Azerbaijan nati anir aoba sülen India-i yoker.

Indian mission-i yaritepa India nung kaketshir 717 densema India nung 1,043 Iran nungi anitetogo. Onoki India nung Israel nungi aniteta Jordan-i anir aoba aser India-i yokba nunga yariteper. Kuwait, Bahrain aser Iraq nung tayimtsü senzüsempongba tsütsü tenokdangba benoka aliba ajanga onoki India nung Saudi Arabia-i anir aoba sülen Indai-i yokba nung yariteper," ta pai metetdaksü.

Mahajan-i, March 18 nü Riyadh nung asüba India nung ka tasügang Bodhbarnep India tonga aruogo, ta metetdaksü.

Oman, Iraq aser UAE nung aliba Indian Missions-i mapang shia ketdangsertem den tongtepratepa samaba India nung ka bushidar, iba denji külemi ano India nung ka tasügang tekaraba nung India-i anir arutsü atema inyakdar, ta pai metetdaksü.

Mongolbar aonung MEA otongdar, Randhir Jaiswal-i, External Affairs Minister S Jaishankar-i India nung Iran ketdangser ajurua tang West Asia nung raraba onük lemsatepogo, ta metetdaksü.



March 25, 2026 nü Srinagar nung People's Democratic Party (PDP) Tir, Mehbooba Mufti-i osangbenertem den jembidang tangokba noksa nung angur.

### IAS menden 1,300 aser IPS menden 505 tazüing lir: Jitendra Singh

**New Delhi, March 25 (Agencies):** Bodhbarnü Lok Sabha senden nung sorkari, Indian Administrative Service (IAS) menden 1,300 aser Indian Police Service (IPS) menden 505 tazüing lir, ta metetdaksü.

IAS menden 6,877 nungi tang officers 5,577 lir aser IPS menden 5,099 nungi tang

officers 4,594 lir, ta Union Minister of State for Personnel, Jitendra Singh-i metetdaksü.

Singh-i, "2012 küm nungi tenzüka candidates 180 bo küm shia civil services examination ajanga IAS shim, aser item menden shilem 4 bo PwBD atema shiteta lir," ta ashi.

Paisa, Union Public Service

Commission (UPSC)-i ketdangtsüa civil services examination (CSE) agia ketdangsertem menden balala nung shimmer, ta metetdaksü.

Mapang shia menden tazüing aliba asadanger, aser IAS menden tazüing alibaji advertise süa shimmer, aser reservation telatetbatem benshir, ta pai metetdaksü.

### Vande Mataram tekong ajak atentsü tuyuba anema benokba ken o magizük

**New Delhi, March 25 (Agencies):** Vande Mataram ken tekong ajak atentsü atema Ministry of Home Affairs (MHA)-i tuyuba anema Supreme Court nung ken o benok, ajisüaka Bodhbarnü Supreme Court-i iba ken oji magizük.

Supreme Court-i, iba ken o angadangtsüji ano tera kerar, kechiyong iba tetuyuba shidak benshitsu atema telatetbatem agüja mali, mesüra tashi mangaba atema temerenshi agütsütsü ta metetdakja mali, ta metetdaksü.

Chief Justice of India (CJI) Surya Kant den Justice ana-Joymalya Bagchi aser Vipul M. Pancholi nungeri akümba bench-i, January 28 nü Union sorkari tuyubaji ozüing ama benokba masü, ta metetdaksü.

CJI Kant-i aniba Bench-i, "Iba tetuyubaji ya kuli ama benokba masü. Tashi mangaba atema temerenshi alitsü, ta kodang sangdongdir mesüra kangshia benokdir idangji onoki iba ken o angadangtsü. Iba

tetuyuba tashi mangaba atema temerenshi-a mali," ta metetdaksü.


Bench-i, "Tashi mangaba atema temerenshi lira, mesüra bendangshidanga benshira nenoki iba court dangi arutsü akok," ta shia iba ken o thinentsü.

1875 küm Bankim Chandra Chattopadhyay-i 'Vande Mataram' mejem aser Rabindranath Tagore-i kensü yangluba sülen 1896 küm Indian National Congress nung iba ken benoka liasü.

Linük nüchiso atema raraba mapang nung iba ken ya tongti yimyim ka aküm.

1950 küm India nung mezüngbuba Tir Rajendra Prasad-i 'Vande Mataram' ya linük ken asütsü, ta sangdonga liasü.

Vande Mataram ya tekong ana dang tena aru, ajisüaka tawa MHA-i tekong ajak atentsü atema tuyuba anema aikati ola adoker, kechiyong tanüingba tekongtem nungji Hindu nung tsüingremtem tushia lir.



March 25, 2026 nü Bengaluru nung Karnataka Chief Minister Siddaramaiah-i 'Swavalambi Sarathi' scheme kübok beneficiary ka nem gari agütsüba temaitsü 'demo key' agütsügang tangokba noksa nung angur. Kasa noksa nung State Deputy Chief Minister DK Shivakumar aser Backward Classes Welfare Minister Shivaraj Tangadagi nata angur.



# TIR YIMYIM

## YIMOBILEM (EDITRIAL)

DIMAPUR THURSDAY, FEBRUARY (METSUREMI) 26, 2026

### LPG aser totzü peria dang lir

- P Tiamongba Aier

Dimapur Deputy Commissioner Dr. Tinojongshi Chang-i March 24, 2026 nü Dimapur nung LPG aser tanga petroleum products alemba repringtsü aser ano bendena ayuba, black market nung miima ayokba mesüra jenjang atuba azüoktsü atema district-level committee ka tentetba osang metetdaksüba ya tepelatsü osang ka lir, kechiyong hopta ishika nübortem LPG cylinder atema kanga tatayuyutepa aser petsaprongtepa arur. Hao, Israel aser United States külemi ser Iran amakba ajanga alima nung totzü aser LPG belenba nung kongshia lir aser linük aika nung timtem ajurur aser jenjang-a tuogo. Ajisüaka, iba West Asia war tenzükba mapang India nung totzü aser LPG peria dang lir anungji petsaprong masütsüla ta sorkari metetdakja liasü, saka olulu balala adoka tesem aika nung, kar LPG rakteper, kar totzü rakteper ta tensa balala ajuruba asenoki ajangshiogo. Ano, tawa sorkari LPG cylinder booking rules melenshiogo ta tiyazü osang ka prokshiba ajanga nübortem kanga shisabuludaktsür. Iba osang ajanga LPG cylinder agizüktsü atema anogo 35 bosa alitsüsa ta ashir saka Centre sorkarisa Bodbarnü iba osang ya tiyazü aser LPG refills atema minimum gap nung temelenshi kecha mali ta jangjatsüogo. Maneni, Centre-isa Bodbarnü linük nung LPG, diesel aser petrol peria dang aliba aser Piped Natural Gas nung temulung agütsüba osang metetdaksüogo. "India nung kümshia crude oil 26 crore tons refine süteter. Tesüiba anogo ishika tsüngda onoki tesem aika nung retail outlets aser petrol pumps nung nisung tarensena noktakba aser petsapronga alitepba nguogo. Ajisüaka totzü peria dang lir anungji shisabulu masütsüla" ta Joint Secretary (Marketing & Oil Refinery), Ministry of Petroleum & Natural Gas Sujata Sharma-i metetdaksüogo. Külen, Prime Minister Narendra Modi-i Bodbarnü Parliament nung jembidang Indian refineries nung crude oil peria dang yur mapa inyakba aser domestic LPG production teimba yangluba den petrol/diesel stocks peria dang aliba osang metetdaksüogo. Linük aika nungi crude oil aser LPG abenba rongtem tonga aruogo aser supply shitak alitsü atema mapa inyakdar ta paisa ashi. India-isa linük 27 nungi crude/LNG/LPG bener aruba tangbo linük 41 nungi abener aser 53 lakh tonnes tema petroleum reserves yangluogo ta PM Modi-isa shiogo anungji Centre sorkari ashiba ama India nung LPG aser totzü agi manüngtsüsa peria dang bendena lir aser tangalen nungi maneni bener arudar. Anungji Dimapur district administration ajanga LPG aser totzü repringshimtsü atema district-level committee ama tanga district tem nunga tenteta nübortem nem nüngdak maliba khuret magütsütsüla. Repringa arudang tesüba nunga aser tan-a LPG shishilembartem aser parnok outlet balala nung inyakertemi parnok nija ajangzüktsü bushia public dang sen talila tur ayoker. Anungji district shia committee tenteta ozüng alema inyakertem mita aotsüla aser ozüng alema bendena ayuba, black market nung ayokba mesürajenjang tur ayokba noktangba den item mapa inyakertem pua temerenshi dalang agütsütsüla.

## OLEMSABANG

### AOMONGCHEN OTSÜ

~ Temjenyuba Longkumer

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Khen mapang ka nung Ao lima yimti ka tenuüng agi Aomongchen tasür liasü. Iba yimti tashitemeteter, kenshioshir aser sobaliba puti metetter sotetdak ta züngshia aruba kangasa tejangja, tenükshitsü aser tongtipang tesem ka liasü. Aser tangar kin ajaki longcha petinu ama penzua parnok asoshi nükrangdong südakja, sobaliba mongin, otsü olem tejangja alidak, oshi temeja aser taret jembidak, tetangshi nokinketer jenti sojasotetdak yimti tasa jalokja, kangasa nükshia repringa liasü. Iba yimti khen mapang kabo tamaren chuba yimli ama mera ketketa meren merena wangshiwangshia liasü. Saka liyonga aodang metet meteta tanem tanemi iba yimti nung soteter jala jabaso aser lanu asensortemji alima memejangi ainba den külemi parnok takum libaliro, jayajako, sopusolemtsü, jembishinü aser sobaliba ajakji khenyongi melenshia parnok sentsüwangshia aliba sentsüji jena oadok. Yamaji aliba mapang ka nung iba yimti kinüklenji kibong ka nung teintet tantsür aser tambur apuani ka tenüng agi otsüla Shisakala aser obula Metetsang tena dang liasü. Tenaji tia kar maka ka jala jabaso kati danga medangsem tena kisung dang liasü. Saka tena takumji khenyongi jeretpera aketba, sobaliba aser wainshin tetangshi, lipoklisang meteter aser tashi tawartem asünung tenaprongla tashikadang tepeyong lokti ajak nung tanishir sür teti tejaklen süa par yimti nübortem anir aru. Jokorbo tenaprongla küm nung tain akümba den, temang nung tashi mait, akhidang ama mera oa shilem magitetti lokti ajak nungi anisüngzuka puken ka ama kümadoker liasü. Saka tenati yimti lanu asensortemji angudang kangasa temolung ayanga aser iba khuret shinga danga melemsatepteti aru. Kechiaser tena ama ka dangji putu tasenba lanurtem jagi litemadokba, tagidak maka tantsür tambür akhumli anü alutsü atartem tasa shia mezüngoki liasü. Yamaji otsüla Shisakala aser obula Metetsang lokdi nung joko tagidak maka ta liaka tena temolungjang kanga zürepbaa "ayah asüngbo asen chirtem ya kechi tia tensa ka ajurutsü" tasa temolung nung khu khua bilema jembitep. Item lanurtem alima melenshia aodang kodanga memelenshiba parnok tera aser ayak ya koma jangjatsütsü aser sayutsü ta bilem. Kechi mapa inyaktsü, mesüra kechi asalentong ka ajanga asen Aomongchener sobaliba ayak ya mesamadaktsütsü ta jempitepa alidang dena rongnung otsüla Shisakalai tasa ka la molungjangi aru aser ibaji obula Metetsang den yamai lemsatep. "Sobaliba Ayak Jangjashi Mensem" ta shiti ka nung zülur anüdoklen nungi anüolen tip tashi iba shitiji prokshidi, aser parnok ajakji asen yimrong dak senteptsü ta zülü nung koda ta lemsatep. Obulai Otsüla olenji metemjung dang hai ta ashi kechiaser ibaji kangasa tasa tajung ka par Aomongchen putu tasenba nung soa inteta atuba lanurtem asoshi kanga temoatsüba aser tejang atangba sendong ka asütsü tasür tenati iba shitiji zülur alima ajunga nung prokshia oa alir ajak nem prokshidaktsü. Ita anogo ishika lir sülen asükwa mapang ka nung parnok ajakji par tazüngba aser maparen ajakji khen atema doktsür par yimtii yimrong jagi sentepa iba mensem nungji aden aser otsüla Shisakala aser obula Metetsang tenati anir iba mensemji tenzuka oa yamai lemsatep.

Otsüla aser obula: Iba sendeni arutsüba purtem ajak arur alitsü ta amanger! Nenok ajak mazüangi pei pei tazüngba kakat riju balala den maparen aser wadang balala nung kanga mazüangi prokshia liaka iba sentong ya kangasa na asoshi mesüra ner lokdi asoshi tongtipang ta angatetta kwika aruogo nenok ajak pelashishia agizüker. Haoni! Otsü aser Obu kenatibo ali rongsenbo kecha agi meyaritettsü, kecha ali senmang magütsütettsü, akhi ama nenok atenshidak mesura sentong balala nung tsüngdong arua shilem magitettsü saka alimar rongsen amer pushiaka mongutetba aser malizüktetba ka lir aser ibaji kenati tanü nenok nem lemsatepa teti asoshi agütsüner.

Tatenshirtem: Ayah! Otsü Obu alima nung rongsen agi malizüktettsüsa aliba ibala senti jia kechi ka asütsü ta süngmangseta aser kangasa yongyaseta bilemer. Ibaji ni aser ozü telokibo angutsü aser agizüktsu matateter ato.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Georgia nung aliba Bethlehem Arogo nung nisung 400 bapti



Georgia nung aliba Bethlehem Arogo nung baptidang tangokba noksa nung angur.

**March 25, 2026:** Georgia nung aliba Arogo ka nung hopta tatembanglen khenyongi nisung 400 baptiogo.

Bethlehem Arogo nung Pastor Jason Britt-i Tanela Temeshi indang aiben sayutsüngia aruba sülen nisung aikati baptitsü melungteta liasü.

Arogo indang campus

asem nung nisung 400 baptida dak sendakba nung Arogoi social media ajanga, "Bethlehem Arogo nung Tsüngremi mapa inyakba onoki ajangshidar. Nüburtem melungjang nung ajungmesoa jembiba ya Tanela Temeshii dang rasaa ashitsü akok," ta metetdaksü.

Arogo nung otongdar kati, "Küm aika metsüh proka liasü aser hopta tatembanglen alu ruhogo," ta metetdaksü.

Pastor Britt-i Tenyartem Mapa 2 nung ajemdaker sayutsüngitsü liasü. Iba Lai nung Pentecost anogo nung mezüng Arogo madak Tanela Temeshi aruba indang shia lir.

## Laishiba ratettsüsabo AI ano junga merenem: Bobby Gruenewald

**March 25, 2026:** YouVersion Bible App tenzüksang aser CEO, Bobby Gruenewald-i, artificial intelligence dak teimlatsü tulu lir, ajisüaka Tsüngrem aser Laishiba dak sendakba tasüngdangbatem langzütettsüsabo tang tashi iba technology junga merenem, ta ashi.

YouVersion Bible app downloads billion ka jungogo. Iba app CEO, Gruenewald-i Laishiba ratettsü atema tang tashi nungbo AI dak metaloktsüsa masü ta ashi.

Tanela tsütsü telangzüba angutsü atema Arogotem, pastor tem aser tamangertem aikati AI chatbots kanga bulua amshitepba mapang nung pai iba o ya jembiogo.

YouVersion-ia coding atemabo AI amshir, ajisüaka Laishiba dak sendakba nung nisungtem nem telangzüba agütsütsü atema AI chatbot mamshir.

"Comma' mesüra oren tera melenshiba ama tilateri metokmeperi alir, ajisüaka ibajia kanga tongtibang. Laishiba shidak meyipzüksü atema ojang shia aser 'punctuation' shiaji kanga tongtibang," ta pai metetdaksü.

AI amshirtem aikati Lai tekong aika temelung nung mali, anungji AI nung Lai tekong aibelena alibaji parnoki memetettsü, ta Gruenewald-i ashi.



Pai dang masü saka Khristan lenirtem aser Lashirtem-a aikati AI tools nung metokameperi alitsü aser Laishiba tai ratettsüa akok, ta shiogo.

2023 küm study ka agiba sülen Christianity Today-i Bible study atema item ama AI tools mamshitsü atema metetdakja liasü.

Yaküm Axios report ajanga ashiba agi, United States nung Arogotemi sayutsüngi onük renemtsü, anogo shia sarasadem leniba kaketterem renemtsü aser sarasademba apps atema AI amshi tenzükogo, ta metetdakja liasü.

Ano platforms kar ajangabo Laishiba nung aliba nisungtem den sensaksemtsü mesüra yimsü dak sendakba nung tasüngdangbatem asüngdangtsü atema temelaba agütsür.

Pastor tem kari, item ama AI tools ya outreach atema junger ta ashir, ajisüaka pastor tem kari AI tools nungji metokmeperi lir, ta ashir.

Gruenewald-i, "YouVersion-i iba tebilemstü dak sendakba nung yariner," ta ashi.

Paisa, YouVersion-i AI developers dang Laishiba models tajungba akümtsü atema ayongzüker, ta ashi.

Item models jagi Laishiba shidak ratettsüra YouVersion-ia iba jenjang tajungba akümtsü atema yaritsü, ta pai metetdaksü.

Khristan lenirtem aikati atangji AI ajanga ministry mapa nung teyari anguba lemsatepogo. AI ajanga data asadangteter, tongtepratep renemtsüteter aser ketdangsubaren nunga yarir, ta parnoki metetdaksü.

AI ajanga Lai tekongtem kerakera nguteter, oshi balala nung Lai meyipzükba medemangteter aser oshi-open maitsü jangjateter, ta parnoki ashi.

Gruenewald-i, "Taküm nung kanga tongtibatiba tasüngdangbatem langzüba aser Tsüngrem O nung ajemdaker lenmang shidak sayuba tsütsü asenoki metaloktsü atema iba ya (AI) tajungba küma yanglutsü nungdaker," ta ashi.

Tanü putu nung lanurtemi telangzüba angutsü atema Khristan lenirtem masü saka AI chatbots dak metaloker.

Gruenewald-i, AI ajanga tarutsü nung Khristan ministry nung temelenshi tulu bener arutsütsüa akok, ajisüaka temeshi O dak sendakba nungbo iba ya tamasa jungjunga yanglumatsüla, ta ashi.

## ANO GO ABEN TSÜNGREM DEN

### Temepishiba langzür

"Kibubai Pei sasa mezütetba yarir ta ni tang metet; Pai Pa dang Pei temeshi kotak nungi, Pa tachiji teka tashi tulu takoktem agi langzütsü"

(T.Ken 20:6).

Iba T.Ken ya rarai mapusodang mesüra rara temer, temepishiba aser langzüba ka asütsü akok (20:4,5; 21:2). Tsüngremji teyong nung yur, chuba aser nütsüngtem ken atenba sayur. Iba T.Ken yagi sayubaji Kümtetdakba nung teimla aser kenyongi tamajungji koktetba sayur.

Raraji metenzükdang, chubaji terenemba ka alir, aser Tsüngrem tenüng ajanga Pa teyari tatenba jazüker. Iba temeshi "Tenüng" (1,5,7) ya Tsüngrem tashi aser ainji lir. Tsüngrem temoatsütem, Pa chirtemi Pa asoshi beshira (5) Tsüngremi langzütsü, aser Pa teyari anguba jagi chubaji Pai mezüja shimba ta metettsü (6-8). Alima tashi nung temulung alembaji amajok (7). Taremzük shisatsü aser tanelaji kanga tongtipang ka lir. Taküm nung Tsüngrem dangi ongmedang yokbaji telangzüba yokang ta ashr.

Chuba tamang aser nüburtemi ayimtenba ajanga Tsüngrem adener aser chubaji teti tatem maka alir, aser tsükchirtem ajakji samatsür.

## West Bank nung Khristantem amakba kanga bulua ataloker

**March 25, 2026:** Latin Patriarchate of Jerusalem nung Auxiliary Bishop-i, West Bank nung Khristantem amakba kanga bulua kümdar, ta metetdaksü.

Osangbenertem den jembidang Jerusalem nung auxiliary Bishop, William Shomali-i, "West Bank nung Khristantem amakba kanga bulua kümdar," ta metetdaksü.

Palestine nung Khristantem tesem aika nung timtem ajangshiba dak sendakba nung William-i, bendanger Israel nungertem Palestine nung Khristantem amokmerener, azüker, kiojen raksatsür aser ali temeden magütsür, ta metetdaksü.

"Khristan yimsüng Taybeh nung alirtem kanga amokmerener. Onoki iba osang ya alima ajak nem metetdaksüogo. Tev Aviv nung aliba American ambassador nem-a onoki iba osang ya metetdaksüogo. Pai iba tesem semdangogo aser mera agia inyaktsü ta onok dang nangzüka liasü, ajisüaka tang tashi kecha meinyaker," ta pai metetdaksü.

Iba yimdak Khristantem meyong gari aika rongdoktsüogo aser ali kiburtem alui aoba nokdangtsü meranger, ta pai metetdaksü.

"Ano north tsütsülen Birzeit nunga Palestine nung Khristantem anema inyakba kanga bulua kümogo. Anogo shia bendangertem arua

Khristantem amokmerener. Iba region nung Khristan nütsüng ishika dang lir, aser tang maneni Khristantem anema inyakba ajanga tarutsü tiaji koma asütsüar mejangjar," ta pai metetdaksü.

"Bethlehem anasa Urtas nunga nun tem indang convent ka aliba li atsünga agitsü meranger. Nun tem meyong tenem ka lir aser yangji parnoki 'olive' den tanga tsünütsü aika tsünur. Bendangertem iba tenemji atsünga agitsü meranger," ta pai metetdaksü.

Beit Sahour (Shepherd's Field) nunga bendangertem iba li ya parnok meyong ta asütsü atema Israel nung wako ka songogo. Atangji nungbo iba li ya Beit Sahour nung aliba Khristan ka meyong lir, ta paisa metetdaksü.

Israel-i West Bank atsünga agitsü meranga 1967 nungi tenzüka parnok aika arua alir, aser ibaji ajanga Palestine nungertem timtem kanga ajangshir.

Linüktem aikati Israel-i West Bank atsünga agitsü merangba ya International ozüng kübok aibelen lir, ta aitsür.

Israel nungeri iba ama tashiyim amshiba ajanga Palestine nung Khristan nütsüng kanga ajema kümogo. 1945 küm Palestine nung Khristan nütsüng 135,550 liasü, saka tanübo Khristan nütsüng 45,000-50,000 dang kümogo.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Wamerem**

(n) angmerem (red dyed yarn)

\* Tetsürtemi wamerem agi tenarong nung anutsü naro yanglur.

**Wamesa**

(v) anünüba mapang kulongkusüa tango satokba (yawn)

\* Tsüingsang majungba mapang kanga wamesa asür.

**OLONG PAITEP # 7455**

|    |    |    |  |    |  |    |    |
|----|----|----|--|----|--|----|----|
| 1  |    | 2  |  | 3  |  | 4  |    |
|    |    |    |  |    |  |    |    |
|    |    | 5  |  | 6  |  | 7  |    |
| 8  |    |    |  |    |  |    |    |
|    |    | 9  |  |    |  |    |    |
|    | 10 |    |  |    |  |    |    |
|    |    |    |  |    |  |    |    |
|    |    |    |  |    |  | 11 | 12 |
|    |    | 13 |  |    |  | 14 |    |
|    |    |    |  |    |  |    |    |
| 15 |    |    |  | 16 |  |    |    |

**TIPLIN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüingsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüing tajemetdak - (6)
- 12. \_\_\_ adenshi - (4)
- 14. Tsünüsenbongsü adokdak - (3)

**OLONG PAITEP # 7453 TELANGZÜBA**

**TIPLIN :**

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER**



Sri Lanka nung retired Rear Admiral Princely Liyanage-i Guinness World Records asem tashi yanglutetogo. Princely Liyanage-i March 20 nü manual treadmill ka nung asemtsü tenzükba March 22 anepdang tashi ghonda 48 asema liasü.

Iba otsü yangluba nung Ministry of Defence Sri Lanka aser Sri Lanka Navy ajanga yaritepa liasü.

**Tinsukia nung constituency 6 atema candidate 27 lir**

Tinsukia, March 25, 2026 (Agencies): Assam Assembly elections atema tenüing agütsüba anogo March 23, 2026 nü tembangogo aser Tinsukia district kübok constituency 6 nung candidate 27-i tenüing agütsüogo.

Tinsukia constituency nung nominations teimtiba arua lir. Parnok rongnung BJP candidate Pulak Gohain, Congress candidate David Phukan, RPI candidate ka aser Independent aika lir.

BJP, Congress, Asom Jatiya Parishad (AJP), Trinamool Congress (TMC), Jharkhand Mukti Morcha (JMM), Rajior Dal aser Republican Party of India (RPI) amala tongti political party tem den independent candidate aikati

March 23 nü tenüing agütsüogo. 81 Sadiya constituency nung AJP candidate Jagadish Bhuyan-i independent asem Lalit Deori, Abraham Tirkey aser Dilip Borgohain nung den tokteper. Iba constituency nung tzümetsüing, ayongküm anenzüka aoba aser infrastructure majungba agi timtema arur. Kümshia Brahmputra ajanga kibongtem pei talidak toktsür odaktsür aser alutem raksatsür.

Doomdoo constituency nung BJP candidate Rupesh Gowala aser Congress candidate Durga Bhumi na dang tokteper. Iba constituency nung süngolu nung mapa inyakeremi tayongzükba jenti ajurua arur.

Nakmati talubosa angudak

Margherita constituency nung BJP candidate Bhaskar Sarma, Rajior Dal candidate Rahul Chetry aser JMM candidate Jarnel Minz nung tokteper.

Digboi constituency nung candidate aika lir. Parnok rongnung BJP nung Suren Phukan, Rajior Dal-i nungitba independent Dulal Moran, TMC nung Jiten Nag, JMM nung Bharat Nayak aser ano independent candidate kar lir.

Makum constituency tasen tenteter tang mezüing atema election agir aser iba constituency nung party balala nung candidate tem lir. Parnok rongnung BJP candidate Sanjay Kishan aser Congress candidate Shibnath Chetia na dena lir.

**MINISTRY OF RURAL DEVELOPMENT GOVERNMENT OF INDIA**

ORGANISED BY Nagaland State Rural Livelihoods Mission (NSRLM) Department of Rural Development, GoN

**AUTHENTIC × RURAL × INSPIRING**

**SARAS FAIR 2026**

**26<sup>TH</sup> - 31<sup>ST</sup> MARCH, 2026**

**KHUOCHIEZIE (LOCAL GROUND), KOHIMA**

**11 AM - 9 PM DAILY**

**FREE ENTRY**

**HIGHLIGHTS**

SHG EXHIBITION STALLS • ETHNIC CUISINE STALLS

KIDS FUN ZONE • BUYERS-SELLERS MEET

ETHNIC CULTURAL SHOW • MEDICAL CAMP

ALL-AGE ENTERTAINMENT • JOB COUNSELING

AADHAR/FSSAI REGISTRATION • FREE CMMFI & CMLIS CAMP

TEXTILES, HANDMADE GOODS, & CULTURAL CREATIONS & MANY MORE

(STALLS ARE OPEN FROM 11 AM TO 9 PM)

**COMPETITIONS**

CHORAL COMPETITION • CULINARY COMPETITION • DANCE COMPETITION

**SARAS LIVE STAGE @6:00PM**

FEATURING

NAGALAND FOLKLORIC • SENTIEM KICHU • AKHRIEZE

KENEISENUO SORHIE • SENTI AND HOPONG • SHAU EVANS

PELENUO YHOME • MOKO KOZA • SAVIZO

SCAN FOR MORE DETAILS

SPONSORS

MEDIA PARTNERS

MANAGEMENT PARTNER

# Belarus Tir Lukashenko-i tang mezüngbuba North Korea semdanger

**Minsk, Metsüremi/March 25 (Agencies):** Belarus Tir Alexander Lukashenko-i anogo ana atema North Korea semdanger. Linük ana tesendaktep akangshitsü nükjiding nung Lukashenko-i tang iba linük semdanger.

Belarusian state news agency Belta-i ashiba agi, Lukashenko-i anogo ana North Korea semdangba ya Bodhbarnü tenzükogo, koba linük ana tejangraba jangjatsü aser project tongtibattem benoka inyaksü atema lir.

Lukashenko-i ashiba agi, "tesendaktep akangshitsü atema mapang tongogo. Tang tensa balala ajanga onok kati ka anasabai arudaksür."

Belarus tir yagisa, North semdangba mapang "treaty of friendship" ka aser tenanzüktepa ter shi nung sign asütsü parnok sentong lir.

Kim Jong Un aser

Lukashenko na Septemer ita Beijing kübok Tiananmen Square nung military parade ka nung shilem agiba mapang ajurutepa liasü. Iba mapang North Korea lenir yagi Lukashenko jaoka liasü.

Iba ita tetenzüklen Lukashenko dangi yokba shiti ka nung Kim-i, tensa apir linük ana tsüngda tesendaktep yanglushitsü atema mulunga lir, ta ashiba North indang official Korean Central News Agency (KCNA)-i metetdaksü.

Kasa mapang nung Belarus nung lenir yagi, jenjang ajak nung Pyongyang den yimden yimsüsüba aser rongsenketzüng tsütsü tesendaktep atsülangshitsü Minsk mulunga lir ta ashi.

North Korea nuclear weapons programme aser missile tem tendangba ajanga dang masü saka Ukraine den rara nung Russia nem teyari

agütsüba atema anüolen aliba linüktemi parnok nem tenokdangba agütsür lir.

South Korea aser anüolen aliba linüktem indang intelligence agency temi, North-i Russia nem artillery shell, missile aser rocket system tem agütsüba dang masü saka sepai meyirejang aika yokba asatetogo.

Ken o asadanger temi ashiba agi, iba melena Russia-i North nem senotsü teyari, military technology, chiyongtsü aser energy supply agütsür. Iba ajanga Pyongyang China dak tali memetaloktsü atema lenmang lapoktsüogo.

Russia tir Vladimir Putin-i 2024 küm North Korea semdang aser iba mapang North Korea aser Russia na defence dak sendakba nung tenanzüktepa yanglu, kong tena rongnung ka danga tangari makra military teyari agütsütsü nangzüktepa liasü.

# Philippine tir-i energy emergency ka sangdong

**Manila, Metsüremi/March 25 (Agencies):** Iran nung rara ajanga tetsükdaksü ajangshia aoba mapang Philippine tir Ferdinand Marcos Jr-i national energy emergency ka sangdongogo. Pai ashiba agi linük energy supply lendongbang nung lir.

Philippine transport worker, commuter aser consumer teloktemi Brehostuibarnü nungi tenzükba anogo ana longkak aittsü sentong yanglur aliba mapang tir-i Mongolbarnü emergency ya sangdongogo. Totzü nung jenjang tali küma aoba anema longkak aitiba sentong ayongzükogo, koba parnoki ashiba agi, Marcos administration-i kara kara jenjang magiba ajanga lir.

"Domestic rongsenketzüng aser alima ajunga nung energy supply nung minprong ajanga tetsükdaksü adokdaksüba bentetsü atema National energy emergency sangdongba ajanga sorkar nem temzüng ozüng kübok jenjang tapet agitsü asoshi lenmang lapoktsütsü," ta Marcos Jr-i ashi.

Emergency benokba dak sendakba nung totzü, chiyongtsü, mozü, aluyimandang amshiba osettem aser tanga tenüngdakba osettem bentet benteta shibelentsü, supply aser lemshitsü asoshi committee ka tentetogo, ta pai ashi.

Emergency ya küm ka tashi benoktsü aser iba ajanga sorkar nem totzü aser petroleum product tem mapang shitak nung alizüka supply asütsü aser nüngdak dang süra senotsü jelia agüja atatsü asoshi tashi agütsütsü.

Iba ajanga ano ketdangsürtem nem, ozüng

alema totzü miimzükba ayuba aser petroleum product supply tem tajanzük asoshi inyakyim alema yokyatsüyaba anema jenjang agitsü asoshi tashi agütsütsü.

Mongolbarnü Secretary of Energy Sharon Garin-i osangbenertem dang ashiba agi, linük nung anogo 45 atemabo totzü peria lir.

Garin-isa, Southeast Asia

aser tanga linüktem nungi totzü barrel million 1 alitsü atema sorkari inyakdar, ta ashi.

US dangi Philippine Ambassador Jose Manuel Romualdez-i Reuters news agency dang ashiba agi, US-i tenokdangba agütsür aliba linük dang nungi totzü alitsü atema temelaba agütsükdaksütsü asoshi Manila-i Washington den inyaktepar.

## MULUNGNEN O



**ASO: 08-09-1986**      **ASÜ: 17-03-2026**

Temeim kinungbo asür **Wb. Lensanok Longkumer**, tamangu ajungpen lendong ajurua iba akümlir wadang tempangba mapang, Ungma Yimden, Arogo, Department-i anir lokti tentet balala, medemertem, kiyonger aser tesem balala nungi nübu, rongsen, osettsüset den sarasadem agi ozü kibong nungita asüko tatepang tashi yariba asoshi kangasa pelaba lemsateper.

Nenok temeim mapa onoki teti bilemtetsü aser Tsüngremi nenok ajak mola-moshia moajangma.

~ Temeim kinungtsü, chirnurtem aser kinunger.

### Principal District Judge

Mokokchung: Nagaland  
S/C. No. 47/2026

#### NOTICE

**NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-I OF INDIAN SUCCESSION ACT 1925.**

Whereas an application under Succession Act 1925 for grant of Succession Certificate for the estate/pension benefits of Late Akumtong Longkumer has been applied by Shri. Tsuknungmeren F/o Lt. Akumtong Longkumer, R/o H.No. 112 Yimsongkong Sector, Ungma Village, Mokokchung, Nagaland for possession of : 1. CMHI

Notice is hereby given that any person having interest in the administration of the estate/pension benefits of the said deceased may if she/he so desire appear in this Court on or before the said day of 25.04.2026.

Given under the hand and seal of the Court on this day the 25.03.2026.

**Sd/-**  
**Principal**  
**District Judge, Mokokchung**

Office of the  
**Longkhum Putu Menden**  
Mokokchung, Nagaland  
**SANGDONGER**

28 Koridang A/c By Election matem tashi Longkhum SAIRANG nung malir, Longkhum yimsüsür nungi temelaba magi Longkhum lushi nung anenzükba senzüsü memelar.

Aibelener temerenshi tulu alitsü.





**Trump indang 15-point yimjung sentong Iran-i magizüker**

**Tehran, Metsüremi/March 25 (Agencies):** Tang rara and assassinations" ta ajaba aliba tembangtsü nükjiding jungjunga anentsü, tarutsü nung nung United States-i 15-point iba ama meinyaksü guarantees ceasefire proposal ka benokba takang dena lir. Tehran-i rara Bodhbarnü Iran-i magizük aser ajanga raksatsüba aser parnoki ceasefire atema aibelenba temelen rongsen mapang aser teinyaksütem par koba tashi agütsütsü ta tejangja aginer.

US peace plan nung Tehran-i telangzüba tamajung nungya region nung allied agütsüogo, ta Iran indang groups tem densema front English oshi broadcaster Press ajungalen raraba jungjunga TV ajanga ashi.

"Pari tenzükba rara Iba den külemi Iran-i Strait tembangtsü nükjiding nung of Hormuz ya par meyong ta America nungeri proposal agizüktsüla ta ashir aser iba agütsüba nung Iran-i tongtipang tzü lenmang telangzüba tamajung agütsüogo aser rara ya Iran-i aginüba azüoktsü ya par temeden aser mapang tembangtsü," ta Iran anema nokdaker temi iba sülen anidaksü guarantee meshir.

Item takhangba ya taoba mapang Geneva nung jembishinü akadang benokba malitsü... Iran-i iba rara dak alia lir ta ashir, koba US tembangtsü atema telemtetba aser Israel nati February 28 nü agidang rara ya tembangtsü, aser Trump-i bilemba ama nungi tenzükba Iran amaktsü masütsü," ta ketdangsüri ashi. mapang tatsüka lia mena liasü.

Press TV ajanga ashiba agi, Item conditions ajunga ketdangsür temi rara agizüknung dang ceasefire tembangtsü atema tongtipang atema jembitsü ta Iran-i conditions pongu agütsü. Item metetdaksüogo.



## NHPCL Limited

(A Government of India Navratna Enterprise)

NHPCL Office Complex, Sector-33, Faridabad-121003 (Haryana).  
CIN : L40101HR1975GOI032564

#### SCHEDULE

[To be published in pursuance of Clause (7) of Regulation 23 of Central Electricity Regulatory Commission (Conduct of Business) Regulations, 2023]

- Tekalen tenüng shia aliba petitioner-i **Subansiri Lower HE Project (2000MW)** atema tariff jangjatepsü petition ka Central Electricity Regulatory Commission, New Delhi nem agüja lir.
- Generating station nungi teyari agirtem :

|  |  |
|--|--|
| i) Uttar Pradesh Power Corporation Ltd, UP                         | xi) Maharashtra State Electricity Distribution Co. Ltd., Maharashtra |
| ii) Haryana Power Purchase Centre, Haryana                         | xii) Electricity Department, Govt. of Goa, Goa                       |
| iii) Chandigarh Power Distribution Limited (CPDL), Chandigarh      | xiii) Manipur State Power Distribution Co. Ltd, Manipur.             |
| iv) Jaipur Vidyut Vitaran Nigam Ltd. (JVVNL), Rajasthan.           | xiv) Department of Power, Nagaland.                                  |
| v) Ajmer Vidyut Vitaran Nigam Ltd. Rajasthan.                      | xv) Assam Power Distribution Co. Ltd, Assam.                         |
| vi) Jodhpur Vidyut Vitaran Nigam Ltd, Rajasthan.                   | xvi) Tripura, State Electricity Corporation Ltd. (TSECL), Tripura.   |
| vii) Punjab State Power Corporation Ltd. (PSPCL), Punjab           | xvii) Power and Electricity Department, Mizoram                      |
| viii) Chhattisgarh State Power Distribution Co. Ltd, Chhattisgarh. | xviii) Department of Power, Arunachal Pradesh                        |
| ix) Gujarat Urja Vikas Nigam Limited (GUVNL), Gujarat.             | xix) Meghalaya Power Distribution Corporation Ltd, Meghalaya.        |
| x) M.P. Power Management Company Ltd (MPPMCL), Madhya Pradesh.     |  |

3. Capacity of the generating station : 2000 MW (8 x 250 MW)  
4. Approved capital cost of the project : Rs. 6285.33 Crores at (Dec' 2002 Price Level)

Authority which has approved the Capital Cost: CCEA  
**Note:** Revised Cost Estimate amounting to Rs. 29948.22 Crores is under process of approval by Board of Directors of NHPCL Ltd.

5. Scheduled date of commercial operation : 08.09.2010  
6. Actual date of commercial operation :

|  |                      |
|--|----------------------|
| <b>Actual :</b>                          |                      |
| Unit #2 : 23.12.2025                     | Unit #3 : 01.02.2026 |
| <b>Anticipated :</b>                     |                      |
| Unit #1 : 20.03.2026                     | Unit #6 : 30.06.2026 |
| Unit #4 : 31.03.2026                     | Unit #7 : 31.12.2026 |
| Unit #5 : 30.06.2026                     | Unit #8 : 31.12.2026 |
| Power Station : 31.12.2026 (anticipated) |                      |

7. Capital cost on the date of commercial operation (excluding NIDC) : Rs. 29190.17 Crores (anticipated)

8. Details of tariff:

| Sl. No. | Hydro Power Generating Station       | Tariff for the previous year  | Year-wise tariff sought to be determined |            |            |            |            |
|---------|--------------------------------------|---|--|------------|------------|------------|------------|
|         |                                      |   | FY 2024-25                               | FY 2025-26 | FY 2026-27 | FY 2027-28 | FY 2028-29 |
| 1.      | Annual Fixed Charges (Rs. in Crores) | NA  | -  | 842.87     | 4849.24    | 5816.11    | 5801.36    |
| 2.      | Primary Energy Charges               | Primary Energy Charges are part of Annual Fixed Charges and it is 50% of Annual Fixed Charges |  |            |            |            |            |

9. Tariff jangjatsü atema petition copy ka "Commercial" kübok website <https://www.nhpcindia.com> nung inokja lir.

10. Tariff jangjashitsü atema petition agüja aliba nung metongshitsü aser tai aputsü lira, tajanzük agir densema nisung mashi kati Commission indang e-filing portal ajanga iba sangdong adoker anogo 30 tsüngta Petitioner nem copy ka dener agütsütsüla.

Place : Faridabad (Mohd. Faruque)  
Date : 18.03.2026 General Manager (Comml), Commercial Division

### Miami Open: Sinner-i maneni alizüng tasen aika tongtetdar



**Metsüremi/March 25, 2026 (Agencies):** ATP Masters 1000 events nung Novak Djokovic-i record yanglur aliba ajanga set timtiba atonga akokba asayar akümba sülen ghonda 24 dang lir Jannik Sinner-i ano Roger Federer ajateta alizüng tasen ka tongtetogo.

Miami Open tebur kija asaya round pezübuba nung Alex Michelsen 7-5, 7-6(4) agi akokba sülen Sinner ya

quarterfinal-i aiba dang masü saka pa Masters 1000 career winning percentage list nung tasembubai tuogo.

Pa indang percentage 78.03% (103-29) aser pai Federer (77.91%) ajatetogo.

Pa iba asayamung tenzükba mapang iba list nung pongububa nung liasü aser tang pai Rafael Nadal aser Djokovic na dang memenepe lir.

Masters 1000 career winning percentage list: Nadal

- 82.00% (410-90); Djokovic - 81.40% (420-96); Sinner - 78.03% (103-29); Federer - 77.91% (381-108); Alcaraz - 77.39% (89-26).

Maneni Sinner ya Indian Wells aser Miami na nung asaya 15 dak tema atonga akokba asayar pezübuba küma Federer, Djokovic, aser Alcaraz nunger den densemogo.

Pa quarterfinal nung Frances Tiafoe mesüra Terence Atmane na rongnung ka den asayatsü.

Kasa asayamung tetsür kija asaya nung Coco Gauff-i 6-3, 1-6, 6-3 agi Belinda Bencic madak takok ngua la semi-finals tongtetogo.

La Indian Wells asayamung nung teka yiruba ajanga masayatetsüsa akümba sülen Miami Open masayatsü bilema liasü.

Ajisüaka arishi küm 22 tain asayar yagi iba asayamung nung odang asayatsü telemtetba agi, kong lai tang tashi nung round of 16 adena asayadanga mali.

La semifinal nung Czech tsür 13th seed asayar Karolina Muchova den asayatsü.

Muchova-ia quarterfinal asaya nung 7-5, 7-6 (7/5) agi Canada tsür 10th seed Victoria Mboko koka semifinal tongtetogo.

### Asia Cup: India nunger archer temi bronze medal ana angu

**Metsüremi/March 25, 2026 (Agencies):** Asia Cup World Ranking Tournament Stage 1 tanabuba anogo Bodhbarnü India nunger archer temi bronze medal ana anguba den tebur recurve aser tetsür compound team final tongtetogo.

Tetsür compound team-i taoba asayamung nung bronze medal nguogo, saka tangbo parnoki gold mesüra silver medal bo angutsü jangaago.

Chikitha Taniparthi, Raj Kaur aser Tejal Salve nungeri semifinal asaya nung Kanyavee Maneesombatkul, Kanoknapus Kaewchomphu aser Chaniddapa Thanaratpitinan nunger 229-226 agi akok aser parnok third-seeded Kazakhstan team den asayatsü.

Tebur compound section nungbo tezüdang kar liasü, kong India-i asayar tejentiba asem yoka liasü.

Qualification round nung temaba jenjang nung tembangaka India nunger archer temi parnok indang title defend mesüteti bronze medal dang angu.

Rajat Chauhan, Rishabh Yadav aser Uday Kamboj nungeri semifinal nung Vietnam team 233-234 agi makok.

India team-i asaya kanga junga tenzük saka tanabuba set

nung point 57 dang angu aser kasa mapang nung Vietnam team nungi Cong Duc Dang, Ngoc Tu Pham aser Xuan Huong Tran nungeri perfect 60 ka akha.

Iba sülen Vietnam team-i maneni kanga junga asaya-tasembuba set nunga point 60 angu aser point ka agi parnok tejakdang aküm. Tatembangbuba set nung team anapronglai point 59 ngua India team-i tera agi iba asaya makok.

Ajisüaka bronze medal atema asayaba mapang India-i 234-232 agi Bhutan koka liasü.

Recurve section nung India tebur team-i 5-1 agi Malaysia koka final-i iogo. Top set Devaang Gupta, Sukhchain Singh aser Juyel Sarkar nungeri set ka dang mekoki iba asaya ayong ayonga akok.

Tetsür recurve team-ia Malaysia 5-1agi koka bronze medal ka nguogo.

Ruma Biswas, Kirti aser Ridhi Phor nungeri bronze medal atema asaya ya amokbanger asaya aser parnoki mezüngbuba set nung point 60 angutsü aliba nungi 59 ngua 59-56 agi akok aser tanabuba set 53-50 agi akok. Tasembuba set nungbo team anapronglai point 52-52 angu.

### Nepal nung asosang Abneet Bharti India team nung züngoksemogo



**Metsüremi/March 25, 2026 (Agencies):** Nepal nung asoba defender Abneet Bharti, Hong Kong den AFC Asian Cup qualifier masaya tsüingda Kochi nung Indian senior men's football team camp nung denogo, ta AIFF-i Bodhbarnü metetdaksü.

Kasa asaya atema squad nung Ryan Williams züngoksemba sülen anogo ka lir Bharti shimogo.

Tang mezüngbuba India team nung bendanglen amendaker aliba asayar ana-arishi küm 27 tain defender Bharti aser arishi küm 32 tain winger Williams- lir. Williams-i tawa Indian passport.

agizükogo.

FIFA temelaba mapa shitak nung manguba ajanga Williams Bangladesh denbo masayatet, saka Bengaluru FC nungi asayar ya March 31 nü Hong Kong den India team nungi mezüngbuba asayatsü renema lir.

Saudi Arabia nung asayatsü aliba 2027 AFC Asian Cup atema India qualify mesütettsü, saka parnok team yanglushiba mapang ka lir.

Defender tejen Sandesh Jhingan career tatembang kati aruba mapang team nung Anwar Ali den temulung alemtsüsa centre-back ka nüngdaker aser temelaba ngura

Bharti ya iba position nung asayatsü tetemsü asütsü.

Ajisüaka Bharti ya tang FIFA nungi temelaba atadar, koba medeni pa masayatettsü.

Bharti ya Nepal nung aso aser Nigeria nung school azüngba mapang pa goalkeeper ka liasü, saka India-i aruba sülen position melen, kong pa BGS International School aser Shastri FC nungi asaya liasü. Pai kanga junga asayaba sülen pa India U-16 camp atema jaok.

Pa Singapore nung Geylang International nung training agi aser iba sülen Spain-i oa Real Valladolid indang academy nung aden.

Pa Germany nunga oa trials nung shilem agi aser Eintracht Frankfurt aser Anderlecht nunger amala club-i tejangraba aliba lemsatetep.

Bharti ya professional ama Polish club Podbeskidzie nungi asaya tenzük aser Portugal nung Sintrense nungi asaya.

Pa Mexican club America-i aotsü jembitep, saka temekok yiruba ajanga motet. Pa 2019 küm India-i meyipa arua Kerala Blasters nungi asaya saka junga masayatet.

Iba sülen pa Czech Republic, Kyrgyzstan, Panama, Argentina nung asayaago aser tang Bolivia nung asayadar.

### Season tembangba sülen Salah-i Liverpool toktsütsü

**Metsüremi/March 25, 2026 (Agencies):** Mohamed Salah-i pa season tembangba sülen Premier League champions Liverpool toktsütsü ta Mongolbarnü sangdong ka ajanga metetdaksüogo.

Arishi küm 33 tain asayar ya 2017 küm Roma nungi Liverpool-i oa aden aser tang tashi nung asaya 435 nung asayar lir. Iba mapang pai goal 255 idakja pa ya club nungi goal timtiba idaktsüba asayatem rongnung Ian Rush aser Roger Hunt na sülen tasembuba jenjang nung lir.

Salah-i Premier League Golden Boots pezüben tashi nguogo aser Liverpool puri 2019/20 aser 2024/25 season nung Premier League akokba mapang pai tongtibang shilem agi aser iba sülen 2019 Champions League akokba mapanga pa club nungi tongtibang asayar ka liasü.

Liverpool nungi asayaba mapang pai Club World Cup, UEFA Super Cup, FA Cup aser League Cup ana kokogo.

Liverpool manager Arne Slot den December ita mangatettep adokba sülen pa Anfield nung tarutsü mejangjai

küma liasü. Pa asaya asem tashi atonga masayadaksüba sülen pai Liverpool aitsü aser pa manager Arne Slot den kecha tesendaktep mali ta ashi.

Social media nung video ka ajanga Salah -i, pa club toktsür aotsü mapang tongogo ta ashi.

"Iba ya kü indang farewell mezüngbuba shilem lir. Ni season tembangba sülen Liverpool toktsütsü.

"Iba club, yimti aser nüburtem ya kü taküm nung kanga tongtibang akümtsü ta ni bilema maliasü. Liverpool ya football club ka dang masü. Iba club indang o agi rasa meshiteter," ta pai ashi.

Salah-isa, "ni iba club nungi asayaba mapang inyaksemertem aser talisa teammate tem ajak dang kanga pelaba lemsatetepner. Iba den ano fan tem danga kanga pelar. Nenoki ni nongita yariba ya o agi rasa ashitsü makoker. Iba ya ni kodanga mamatoktsü.

"Toktsür aotsü temela masü. Nenoki kü taküm nung mapang tajungtiba agütsüogo. Ni teti nenok rongnung ka asütsü. Iba club ya teti ni aser ozü kibong atema ozü ki asütsü," ta pai ashi.

**BILEMDANGANG**  
"Nükjidong yur nü sempet bushiang."